

ZAKON
O POTRAŽIVANJIMA U POSTUPKU PRIVATIZACIJE PO OSNOVU
RAZLIKE PRIMANJA KORISNIKA PRAVA IZ PENZIJSKOG I
INVALIDSKOG OSIGURANJA

Član 1.

Ovim zakonom uređuje se način i postupak utvrđivanja i realizacije potraživanja u postupku privatizacije po osnovi primanja koja su korisnicima prava iz penzijskog i invalidskog osiguranja isplaćena u periodu od 1. aprila 1992. godine do 30. jula 1998. godine na teritoriji Federacije Bosne i Hercegovine (u daljem tekstu: Federacija) i primanja koja su im pripadala po propisima iz penzijskog i invalidskog osiguranja koji su se primjenjivali na teritoriji Federacije u tom periodu (u daljem tekstu: potraživanja), kao i druga pitanja u vezi realizacije potraživanja.

Član 2.

Potraživanja iz člana 1. ovog zakona su razlika između stvarno isplaćenog iznosa primanja u periodu utvrđenom u članu 1. ovog zakona i primanja koja su korisnicima prava iz penzijskog i invalidskog osiguranja pripadala po propisima iz penzijsko-invalidskog osiguranja koji su se primjenjivali na teritoriji Federacije u tom periodu.

Član 3.

Ukupna potraživanja u skladu sa ovim zakonom iznose 734,206.560 KM, i to:

- Društveni fond za penzijsko i invalidsko osiguranje Bosne i Hercegovine 557,181.000 KM;
- Zavod mirovinskog i invalidskog osiguranja Mostar 177.025.560 KM.

Potraživanja iz stava 1. ovog člana utvrđena su po propisima iz penzijskog i invalidskog osiguranja koji su se primjenjivali u periodu iz člana 1. ovog zakona, na teritoriji Federacije prema prosječnoj plaći u tom periodu na osnovu podataka Federalnog zavoda za statistiku.

Član 4.

Potraživanja u smislu člana 2. ovog zakona utvrđuju nosioci penzijskog i invalidskog osiguranja iz člana 3. ovog zakona, po službenoj dužnosti, u roku od 30 dana od dana stupanja na snagu ovog zakona, na osnovu svojih evidencija.

Potraživanja iz stava 1. ovog člana iskazuju se u Konvertibilnoj marki.

Član 5.

Potraživanja u skladu sa ovim zakonom iskazuju se na jedinstvenom računu građana u organizacijskoj jedinici Zavoda za platni promet Federacije Bosne i Hercegovine prema mjestu prebivališta, odnosno boravišta korisnika prava iz penzijskog i invalidskog osiguranja.

Član 6.

Nosioci penzijskog i invalidskog osiguranja iz člana 3. ovog zakona dostavljaju evidenciju o potraživanjima za korisnike prava iz penzijskog i invalidskog osiguranja Zavodu za platni promet Federacije Bosne i Hercegovine na elektronskom mediju za upis potraživanja na jedinstvenom računu građana, u roku od 10 dana od dana isteka roka iz člana 4. stav 1. ovoga zakona.

Evidencija iz stava 1. ovog člana obavezno sadrži slijedeće podatke:

- prezime, ime i djevojačko prezime za ženu,
- datum rođenja,
- matični broj (PIO),
- jedinstveni matični broj građanina,
- iznos potraživanja,
- poštanski broj,
- naziv pošte,
- naziv općine,
- ulica i broj.

Otvaranje jedinstvenog računa vrši se u skladu sa Zakonom o utvrđivanju i ostvarivanju potraživanja građana u postupku privatizacije ("Službene novine Federacije BiH", broj 27/97).

Jedinstveni račun predstavlja certifikat korisnika prava iz penzijskog i invalidskog osiguranja.

Član 7.

Potraživanja, ostvarena u skladu sa ovim zakonom, mogu se koristiti za kupovinu:

- stanova na kojima postoji stanarsko pravo,
- dionica preduzeća,
- poslovnih prostora u vlasništvu općina.

Član 8.

Potraživanja, ostvarena u skladu sa ovim zakonom, prenociva su i nasljeđuju se u skladu sa propisima o nasljeđivanju koji se primjenjuju na teritoriji Federacije.

Član 9.

Potraživanja na osnovu certifikata izdatog u skladu sa članom 6. ovog zakona, mogu se koristiti za namjene iz člana 7. ovog zakona, u roku predviđenom federalnim propisom o potraživanju građana u postupku privatizacije.

Član 10.

Na potraživanja iz člana 2. ovog zakona ne obračunavaju se kamate.

Član 11.

Na ostala pitanja u vezi potraživanja korisnika prava iz penzijskog i invalidskog osiguranja iz ovog zakona, primjenjuju se, na odgovarajući način, odredbe federalnih propisa o potraživanjima građana u postupku privatizacije.

Član 12.

Ovaj zakon stupa na snagu narednog dana od dana objavljivanja u "Službenim novinama Federacije BiH".